

Uunga siunnersuut: Eqqumiitsuliornermik ingerlatsineq pillugu Inatsisartut inatsisaat
(Ilinniartitaanermut, Kultureqarnermut, Iisimatusarnermut Ilageeqarnermullu
Naalakkersuisunut ilaasortaq)

Saqqummiussineq

Siullermeerneqarnera

Eqqumiitsuliornermik ingerlatsineq pillugu Inatsisartut inatsisissaattut siunnersuut Naalakkersuisut sinnerlugit matumuuna saqqummiuppara.

Kulturimik ingerlatsineq sunngiffimmilu sammisaqartitsineq pillugit inatsisiliornerup iluarsartuuteqqinnissaa Naalakkersuisut pisariaqartinneqartutut isigaat. Immikkoortumi *I.2, Inatsimmik piareersaanermi pingaarnertit* ataani allaaserineqarneratut inatsisiliorneq marloqiusamik ingerlanneqassaaq. Siullermik eqqumiitsuliornermik ingerlatsineq pillugu Inatsisartut inatsisaannik saqqummiussisoqarneratigut pissaaq. Aappaalu Inatsisartut UPA 2015/32 akuersissutigineqarnera tunngavigalugu pissaaq, tassani Naalakkersuisut kultureqarnermut inatsimmik, tamatumani kultureqarnerup iluani sunngiffimmi sammisassaqaartitsineq ilanngullugu kiisalu timersornermut inatsimmik, tamatumani sunngiffimmi sammisassaqaartitsineq timersornerup iluani ingerlanneqartoq ilanngullugu UPA 2016-imi saqqummiunneqartussatut ilimagineqartutigut pissalluni.

Inatsisissatut siunnersuutip immikkoortut pingaarnertit marluk isiginiarpai. Siullermik eqqumiitsuliornermik ingerlatsineq aappaattullu innuttaasut eqqumiitsuliornermik ingerlatsinermut periarfissaqarnissaat. Periarfissatut uani pineqarput innuttaasut eqqumiitsuliornermik atituumik ingerlatsinermut peqataanissamatut atuinissamullu periarfissaat.

Eqqumiitsulianik pisiortorneq, inissat tamanit tikiqqartartut pinnerasaasorneri aamma eqqumiitsuliornermut, pisortani pisortallu suliffeqarfiini suliaminnik saqqummersitassatut atukkiussaqarsimasunut takutitsinermut akissaateqaartitsisarneq pillugit aalajangersakkat nutaajusut tassaapput inatsisissatut siunnersuummi takuneqarsinnaasut. Nutaatut pingaaruteqartutullu eqqumiitsuliornermik ingerlatsinermut tapiisarnermi tunngavissat pillugit malittarisassanik aalajangersaasoqarpoq. Tamatumunnga ilaapput Naalakkersuisut kommunalbestyrelsillu tapiissutaat sallerpaatillugu sunut tapiissutaasassanersut, aammali tapiissuteqarnissamik aalajangiisuusutut tunngavissat aalajangersarneqarput tassaassatut eqqumiitsuliornermut pitsaassuseq pikkorissuserlu.

Nutaaliornertut pingaarutilittut siunnersuutip aningaasalersuineq allaffissornikkullu aqutsineq pillugit kapitaliani Naalakkersuisut periarfissinneqarput, Naalakkersuisut eqqumiitsuliornermik ingerlatsinermut tapiissutaannik allaffissornikkut aqutsineq tamakkiisumik ilaannakortumilluunniit Namminersorlutik Oqartussat ataanni suliffeqarfinnut

pisortanulluunniit allanut imaluunniit siunnersuisartoqatigiinnut, ataatsimiititalianut assigisaannullu, siunertamut tassunga Naalakkersuisut pilersissinnaasaannut, isumagisassangortitsinissamut. Naalakkersuisut pisinnaatinneqarput siunertaq, suliassat, katitigaaneq sulinerlu pillugit erseqqinnerusunik aalajangersagaliornissamut, tamatumunnga ilanngullugu siunnersuisartoqatigiit, ataatsimiititaliat assigisaasalu allattoqartinnissaannut tunngasut.

Taamatut naatsumik oqaaseqarlunga siunnersuut Inatsisartunut matumuuna suliassangortippara.